

«El ha gè en maun sia truppa»

Brigada d'infanteria da muntogna 12: Nov cumandant

DA GION NUTEGN STGIER / ANR

■ **A partir da damaun ha la Brigada d'infanteria da muntogna 12 cun Peter Baumgartner in nov cumandant. Il colonel glarunais surpiglia quella truppa cun vers 7000 schuldads da brigadier Franz Nager. Il nov cumandant ha relaziuns stretgas cun Cuira cun esser stà intgins onns cumandant da la piazza d'armas.**

La Brigada d'infanteria da muntogna 12 dattì dapi il 2004 e la sedia principala è a Cuira. A l'entschatta 2012 ha Franz Nager surpiglià il commando da la brigada d'Aldo C. Schellenberg, oz cumandant da l'aviatica militar. A la la Brigada d'infanteria da muntogna 12 appartegnan 7500 schuldads da sis chantuns da la Svizra orientala e da quels derivan bunamain 45% dal Grischun. A partir da damaun han els cun Peter Baumgartner, colonel dal stab general, in nov cumandant. Il Glarunais da 51 onns daventa successur da Franz Nager, il brigadier lucernais, ch'è a partir dal 1. da fanadur il nov cumandant da la furmaziun da scolaziun infanteria a Collombier NE.

Er grazia a la renconuschientscha

Ils quatter onns e mez sco cumandant da Brigada d'infanteria da muntogna 12 sajan stads in temp interessant cun blers ed empernaivels inscuters cun uffiziers e schuldads plain motivaziun e cun ina populaziun che haja adina gè interess per il militar e per la brigada, ha menziunà Franz Nager en ses pled da cumià. Las relaziuns cun las instanzas politicas dals sis

chantuns ch'appartegnan a la brigada sajan adina stadas exemplaricas. Er grazia a quella gronda renconuschientscha da la vart politica haja el en ses temp sco cumandant da la Brigada d'infanteria da muntogna 12 adina gè a disposiziun uffiziers e schuldads motivads, ina truppa da milissa nua che qualitad e quantidad correspundan, ha ditg il cumandant partent.

Resolut e tuttina amiaivel

Melchior Stoller, il divisiunari e substitut dal cumandant da l'armada, ha accentuà che Franz Nager saja stà in cumandant cun in stil da cumandar gentil e social. Sia

capacitad integrativa saja exemplarica, el saja loial, serius, engaschè ed ina persuna da fidanza. Ultra da quai na mancan tar el er betg la pazienza e la perseveranza. Quai sajan tut aspects per esser in bun cumandant sco Franz Nager saja stà. El saja in partun vardaivel ed ina persuna che na pregia betg mo sia filosofia, na el vivia er quella.

Bunamain di e notg preschent

Cusseglier guvernativ Christian Rathgeb ha ditg che Franz Nager saja stà in cumandant che haja gè en maun sia truppa. El saja betg mo stà per la schuldada in disponibil cumandant, mabain er per la politica

e cunzunt per la populaziun. En il Grischun en tuts cas hajan bleras personas indentifgà il militar cun il commando da Brigada d'infanteria da muntogna 12 ed a medem mument cun Franz Nager. Sia preschientscha diligenta saja bunamain inimaginabla, ha accentuà Rathgeb. Er l'attaschadadad tar Cuira, tar la piazza d'armas ed insumma tar il Grischun saja stada da gronda valur. Il chantun Grischun saja sco strusch in auter chantun fitg dependent da l'armada, saja quai tar catastrofes da la natira, auter pensum per la populaziun civila e lura er per grondas occurrenzas sco il Forum mundial d'economia ubain events da sport. Er en quellas chaussas haja Nager adina purschè il maun, ha menziunà Rathgeb.

Esser in bun precursor

Il nov cumandant da la Brigada d'infanteria da muntogna 12, colonel Peter Baumgartner, sa legra da turnar da Berna puspè a Cuira. El haja passentà in bel temp en la chapitala grischuna quels quatter onns sco cumandant da la piazza d'armas e da la scola da recurt d'infanteria 12. El veglia cuntinuar cun la buna lavur da ses antecessur, dar anc dapli paisa a l'instrucziun e cun sia truppa daventar in bun precursor per manar l'armada svizra en ina direcziun seriosa. Surpiglià quel commando n'haja el betg cun l'intent da dissolver a la fin dal 2017 la Brigada d'infanteria da muntogna 12, mabain da gidar a furmar il nov servetsch militar e territorial.



Il nov cumandant, il cumandant partent ed il cusseglier guvernativ cun dus cumandants grischuns dad in battagliaun da la brigada: Damian Casanova, Daniel Steiner, Peter Baumgartner, Franz Nager e Christian Rathgeb (da san).

FOTO G. N. STGIER